

**I. ATALA****BIZKAIKO LURRALDE HISTORIKOKO FORU ADMINISTRAZIOA****Bizkaiko Foru Aldundia****Ogasun eta Finantza Saila**

**Bizkaiko Foru Aldundiaren 1/2020 FORU DEKRETUA, urtarrilaren 21ekoa, kartografia-zerbitzuak emateagatiko Prezio Publikoaren aplikazioa erabaki eta prezio horren araudia garatzen duena.**

Bizkaiko Foru Administrazioaren Tasa, Prezio Publiko eta Bestelako Tributu Baliabideei buruzko 1990eko ekainaren 27ko 4/1990 Foru Arauaren bidez, Foru Aldundiak bere eskumeneko zerbitzuengatik eta jarduerengatik ordainarazten dituen prezio publikoen araubide juridikoa arautu zen.

Gaur egun, kartografia-zerbitzuak emateagatiko prezio publikoak otsailaren 15eko 15/2000 Foru Dekretuak arautzen ditu —haren bidez, kartografia zerbitzuak emateagatiko prezio publikoen ezarpena erabaki eta prezio publiko hori araupetzen da—. Ondoren, irailaren 21eko 160/2004 eta martxoaren 31ko 42/2009 foru-dekretuek aldatu dute 15/2000 Foru Dekretua.

Aztertze- eta hausnartze-prozesu baten ondoren, beharrezkotzat jotzen da testu bakarrean biltzea prezio publiko honen araudi guztia; beharrezko irizten zaio, orobat, berrikusi eta eguneratzeari prezioaren zenbatekoak (prezioaren jarraipenaren barruan), araudi-erreferentziak eta hizkuntza bera (genero-ikuspegiarekin bat etortzeko).

Goian adierazitakoagatik, eta Bizkaiko Foru Administrazioaren Tasa, Prezio Publiko eta Bestelako Tributu Baliabideei buruzko ekainaren 26ko 4/1990 Foru Arauaren 28. artikuluan ezarritako ahalmena erabilita (non ezartzen den prezio publikoak foru-dekretuz ezarri edo aldatuko direla, non eta foru-arau berezi batean kontrakoa xedatzen ez den), foru-dekretu honen bidez, kartografia-zerbitzuak emateagatiko prezio publikoaren aplikazioa erabaki eta prezio horren araudia garatzen da.

Foru-dekretu hau izapidetzeko, kontrol ekonomikoari buruzko txostena eman da eta kontuan hartu da Emakumeen eta Gizonen berdintasunerako ekainaren 4ko 4/2018 Foru Arauak ezartzen duena.

Gainera, Bizkaiko Foru Aldundian xedapen orokorrak egiteko prozedura arautzen duen Bizkaiko Foru Aldundiaren 2017ko urtarrilaren 17ko 2/2017 Foru Dekretuak jasotzen dituen izapide guztiak bete dira.

Hori dela bide, Ogasun eta Finantza Saileko foru-diputatuak proposatuta eta Bizkaiko Foru Aldundiaren Gobernu Kontseiluak 2020ko urtarrilaren 21eko bileran eztabaidatu eta onetsi ondoren, honako hau

XEDATZEN DUT:

**1. artikulua. — Xedea**

Bizkaiko Foru Aldundiko Azpiegituretarako eta Lurralde Garapenerako Sailak egin eta editatzen duen dokumentazio kartografikoaren salmentarako prezio publikoa ezartzea da foru-dekretu honen xedea.

Bizkaiko Foru Aldundiko Azpiegituretarako eta Lurralde Garapenerako Sailak zabal-kunde publikoko sare telematikoetan argitaratzen duen informazio kartografikoaren kasuan, berriz, ez da aplikatuko prezio publiko hau.

**2. artikulua. — Ordaindu behar dutenak**

Pertsona fisiko eta juridikoek eta Bizkaiko Lurralde Historikoko Zergei buruzko Foru Arauaren 34.3 artikuluan aipatutako erakundeek ordaindu behar dute prezio publikoa, baldin eta haien alde Bizkaiko Foru Aldundiko Azpiegituretarako eta Lurralde Garapenerako Sailak egin eta editatzen duen dokumentazio kartografikoaren salmenta egiten bada.

**3. artikulua. — Kobrantza**

Prezio publikoa dokumentazio kartografikoa saltzen den unean eskatuko da.

**4. artikulua. — Salbuespenak**

Bizkaiko Lurralde Historikoko foru-sektore publikoa osatzen duten erakundeez gainera, lurralde-mailako gainerako toki-erakundeak, Euskal Autonomia Erkidegoa eta Estatu salbuesita egongo dira prezio publiko hau ordaintzetik.

**5. artikulua. — Elementu kuantitatiboak**

Prezio publiko hau, BEZa barne, honako tarifa hauekin bat eskatuko da:

## 1. Kartografia:

Eskala	Koloretako papera (€/alea)
1:500	8,85
1:1.000	8,85
1:5.000	8,85
Ortoargazkiak	8,70

## 2. Aurreko kartografia-serieen euskarri informatikoak:

— *Kartografia-minuta:*

Eskala	€/alea	€/CD
1:500	3,45	1,00
1:1.000	3,45	1,00
1:5.000	3,45	1,00
Ortoargazkiak Ortofotos 1:5.000	3,45	1,00

— *Konpilazioak:*

Eskala	€/alea
1:500	6
Ortoargazkiak 1:5.000	10,00

## 3. Ortoargazkien eta hegaldi fotogrametrikoen aireko argazkien fotokopiak: 2,15 €/unitatea.

## 4. Argazki-kalitatea duten hegaldien irudi digitalizatuen kopiak:

— Argazki-kalitatea duten hegaldien irudi digitalizatuen kopiak, zuri-beltzean eta A4 tamainan: 0,50 €/unitatea.

— Argazki-kalitatea duten hegaldien irudi digitalizatuen kopiak, koloretan eta A4 tamainan: 1,50 €/unitatea.

## 5. Mapen edizioa:

	Eskala	€/alea
Bizkaiko erliebedun mapa	1:100.000	25,45

## 6. Prezio publiko hau ordaintzera behartuta egon eta ikerketa-lanetarako dokumentazio kartografikoa behar duten unibertsitateko ikasleei 100eko 70eko hobaria aplikatuko zaie.



Kasu horietan, beharrezkoa izango da unibertsitate-proiektuaren arduradun den irakaslearen edo tutorearen egiaztagiria.

**6. artikulua. — Kudeaketa eta likidazioa**

1. Prezio publiko hau Bizkaiko Foru Aldundiko Azpiegituretarako eta Lurralde Garapenerako Sailak kudeatuko du.
2. Dokumentazio kartografikoa emateak berez ekarriko du aurretik prezio publikoa ordaindu beharra Bizkaiko Foru Aldundiko Azpiegituretarako eta Lurralde Garapenerako Sailak horretarako baimendutako finantza-erakundeetan edo kontuetan.

**XEDAPEN INDARGABETZAILEA****Xedapen Indargabetzaile Bakarra. — Indargabetze normatiboa**

Foru Dekretu hau indarrean jartzen denean indargabetuta geratuko da kartografia-zerbitzuak emateagatiko prezio publikoak otsailaren 15eko 15/2000 Foru Dekretuak arautzen dituen —haren bidez, kartografia zerbitzuak emateagatiko prezio publikoen ezarpena erabaki eta prezio publiko hori araupetzen da.

**AZKEN XEDAPEN****Azken Xedapenetatik Lehena. — Arauak emateko gaikuntza**

Baimena ematen zaie Ogasun eta Finantza Saileko foru diputatuari eta Azpiegituretarako eta Lurralde Garapenerako Saileko foru diputatuari foru-dekretu hau garatzeko eta aplikatzeko behar diren xedapen guztiak eman ditzaten.

Foru-dekretu honetan xedatu ez den guztian, batez ere zorra ordaintzeko moduari eta epeei dagokienez, Bizkaiko Lurralde Historikoko Zergei buruzko Foru Arauan eta Zerga-bilketari buruzko araudian zehaztutakoa izango da aginduzko.

**Azken Xedapenetatik Bigarrena. — Indarrean jartzea**

Foru-dekretu hau Bizkaiko Aldizkari Ofizialean argitaratu eta hurrengo egunean jarriko da indarrean.

Bilbon, 2020ko urtarrilaren 21ean.

Ogasun eta Finantzen foru diputatua,  
JOSÉ MARÍA IRUARRIZAGA ARTARAZ

Ahaldun Nagusia,  
UNAI REMENTERIA MAIZ